

#আমি পদ্মজা পর্ব ২২

মোড়ল বাড়ির আনাচেকানাচে
আত্মীয়স্বজনদের কোলাহল। পদ্মজা বিছানার
এক কোণে চুপটি করে বসে আছে। ঘরে দুই
রমণী আছে কয়েকজন। নিজেদের মধ্যে
রসিকতা করছে। উচ্চস্বরে হাসছে। অথচ
এরাই বিপদের সময় পাশে ছিল না। ভীষণ
গরম পড়েছে। পদ্মজার পরনে সুতার কাজ
করা সুতি শাড়ি। গরমে শুধু ঘামছে না। বমি
পাচ্ছে। প্রেমা পদ্মজার পাশে বসে ছিল।
পদ্মজা প্রেমাকে ফিসফিসিয়ে বলল, 'এই বনু?
আম্মাকে গিয়ে বলবি লেবুর শরবত দিতে?'
প্রেমা মাথা নাড়িয়ে চলে গেল শরবত আনতে।
হেমলতা রান্নাঘরে ছিলেন। প্রেমা লেবুর
শরবতের কথা বললে তিনি বললেন, 'তুই যা
আমি নিয়ে যাচ্ছি।'

লেবু গাছ থেকে সবেমাত্র ছিঁড়ে আনা পাকা
লেবুর শরবত বানিয়ে পদ্মজার ঘরের দিকে
এগোলেন তিনি। গিয়ে দেখলেন পদ্মজা
বিছানার এক পাশে গুটিসুটি মেরে বসে আছে।
উসখুস করছে। ঘরভর্তি অন্যান্য মানুষে। তিনি
সবার উদ্দেশ্যে বলেন, 'সবাই অন্য ঘরে যাও।
পদ্মজাকে একা ছাড়া।'

হেমলতার এমন আদেশে অনেকের রাগ
হলেও বেরিয়ে গেল। তিনি দরজা বন্ধ করে
শরবতের গ্লাস পদ্মজার হাতে তুলে দিয়ে
বলেন, 'সব সময় মুখ বন্ধ রাখা ভালো না। যারা
বিপদে পাশে থাকে না তাদের জন্য বিন্দুমাত্র
অসুবিধার মুখোমুখি হবি না। গরমে তো শেষ
হয়ে যাচ্ছিস। জানালার পাশটাও অন্যরা ভরাট
করে রেখেছিল। ভালো করেই সরতে বলতি।'
পদ্মজা মায়ের কথার জবাব না দিয়ে এক
নিঃশ্বাসে লেবুর শরবত শেষ করল। এবার

একটু আরাম লাগছে। আলনার কাপড় গুলো অগোছালো। সকালেই তো ঠিক ছিল। নিশ্চয় মেয়েগুলির কাজ। হেমলতা আলনার কাপড় ঠিক করতে করতে জিজ্ঞাসা করলেন, 'কী নিয়ে এত চিন্তা করছিস?'

পদ্মজা কিছু না বলে বিছানায় আঙ্গুল দিয়ে আঁকিবুঁকি করতে থাকল। পদ্মজার অস্বাভাবিকতা দেখে হেমলতা কপাল কুঁচকালেন।

'বলবি তো?'

পদ্মজা বিচলিত হয়ে বলল, 'আম্মা উনি বোধহয় আজ আসবেন।'

'উনি? উনি কে? আমির?'

'না আম্মা। লিখন শাহ যে, উনি।'

হেমলতা দীর্ঘশ্বাস ছেড়ে স্বাভাবিক কণ্ঠে বললেন, 'কপালে যা আছে তাই তো হবে। ভাবিস না। আমি আছি, সব সামলে নেব।'

লিখনকে আমি বুঝাব।’

হেমলতার কথা শেষ হতেই, পদ্মজা ভেজা
কণ্ঠে বলল, ‘উনি খুব কষ্ট পাবেন আন্মা।’

হেমলতা অবাক হয়ে তাকান পদ্মজার দিকে।

পদ্মজা এতো ব্যকুল কেন হচ্ছে? তিনি কী
পদ্মজার অনুভূতি চিনতে ভুল করছেন? নাকি

শুধুমাত্র কারো মন ভাঙবে ভেবে, পদ্মজার

এতো ব্যাকুলতা! হেমলতা দোটানায় পড়ে যান।

পদ্মজার জীবনে এ কেমন টানাপোড়ন! এই

মুহূর্তে পদ্মজাকে বুঝে উঠতে গিয়ে হিমশিম

খাচ্ছেন তিনি। ওদিকে হানি ডাকছে।

হেমলতার বড় বোন হানি, গতকাল ঢাকা থেকে

গ্রামে এসেছে। ছেলেমেয়ে নিয়ে এসেছে।

হেমলতা দরজার দিকে পা বাড়ান। তার আগে

বলে গেলেন, ‘আমার নোংরা অতীত শুনাব

আজ। বাকি সিদ্ধান্ত তোর। যা চাইবি তাই হবে।

মনে রাখিস, যা চাইবি তাই পাবি।’

পদ্মজা কিছু বলার আগে হেমলতা চলে
গেলেন। পদ্মজার বুকের ভেতর অপ্রতিরোধ্য
তুফান শুরু হয়। মায়ের অতীত জানার জন্য
কত অপেক্ষা করেছে সে। আজ যখন সেই
সুযোগ এলো, তার ভয় হচ্ছে খুব। কেন হচ্ছে
জানে না। কিন্তু হচ্ছে। হাত, পায়ের রঙে রঙে
শিরশির অনুভূতি।

ভ্যানগাড়িতে চড়ে অলন্দপুরের আটপাড়ায়
তুকল লিখন শাহ। সাথে বাবা-মা এবং বোন।
বাবা শব্দর আলী, মা ফাতিমা বেগম। বোন
লিলি। শব্দর আলী চশমার গ্লাস দিয়ে গ্রামের
ক্ষেত দেখছেন। আর বার বার বলছেন, 'এই তো
আমার দেশ। এই তো আমার বাংলাদেশ।'

ফাতিমা ভীষণ বিরক্ত ভ্যানে চড়ে। উনার ইচ্ছে
ছিল কোনো মন্ত্রীর মেয়েকে ঘরের বউ করে
আনবেন। আর ছেলের নাকি মেয়ে পছন্দ

হয়েছে গ্রামে। ছেলের জেদের কাছে হেরে
আসতেই হলো।

লিখনের পরনে ছাইরঙা শার্ট। চোখে সানগ্লাস।
উত্তেজনায় তার হাত পা কাঁপছে রীতিমতো।
এমন একটা দিন নেই, যেদিন পদ্মজার কথা
ভেবে শুরু হয়নি। এমন একটা রাত নেই, যে
রাতে পদ্মজাকে নিয়ে স্বপ্ন দেখা হয়নি। মাঝের
সময়ের ব্যবধানে পদ্মজাকে খুব বেশি
ভালবেসে ফেলেছে সে। স্বপ্নে কোমরে আঁচল
গুঁজে ঘরের কাজ করা পদ্মজাকে দেখতে
পায়। কখনো বা অপরূপ সুন্দরী পদ্মজাকে
ঘুমের ঘোরে ঠিক বিছানার পাশে শাড়ি পরা
অবস্থায় দেখতে পায়।

কল্পনার পদ্মজাকে নিয়ে সে সংসার পেতেছে।
এবার হয়তো সত্যি হতে চলেছে। লিখন
আনমনে হেসে উঠল। মনে পড়ে যায়
পদ্মজাকে প্রথম দেখার কথা। সঙ্গে,সঙ্গে

বুকের মধ্যে অদ্ভুত ঝড় শুরু হয়। কী মায়াবী,
কি স্নিগ্ধ একটা মুখ। তার চেয়েও সুন্দর
পদ্মজার ভয় পাওয়া। লজ্জায় পালানোর চেষ্টা।
পর পুরুষের ভয়ে আতঙ্কে থাকা। লিখন
আওয়াজ করে হেসে উঠল। ফাতিমা, শব্দর
অবাক হয়ে তাকালেন। লিলির এসবে খেয়াল
নেই। সে আকাশের দিকে তাকিয়ে কী যেন
ভাবছে। লিখন মা-বাবাকে এভাবে থাকাতে
দেখে, খুক খুক করে কাশল। এরপর
বলল, 'সুন্দর না গ্রামটা? বুঝছে আব্বু, এই
গ্রামটাই এতো সুন্দর যে আবার আরেকটা
সিনেমার জন্য আসতে হবে আগামী বছর।'
শব্দর আলী প্রবল আনন্দের সাথে বলেন, 'সে
ঠিক বলেছিস। মন জুড়িয়ে যাচ্ছে দেখে।
চারিদিকে গাছপালা, নদী। রাস্তাঘাটও খুব
সুন্দর। এখানে একটা বাড়ি বানাতে কেমন
হয়?'

লিখন গোপনে দীর্ঘশ্বাস লুকালো। তার বাবা
যখন যেখানে যায় সেখানেই বাড়ি বানানোর
স্বপ্ন দেখেন। কিন্তু বানানো আর হয় না।

ফাতিমা বিরক্ত গলায় বললেন, 'তা আমরা
উঠছি কার বাড়ি? তোর পছন্দ করা মেয়ের
বাড়ি নাকি অন্য কোথাও?'

মায়ের চোখে মুখে বিরক্তি দেখে লিখনের হাসি
পেল। বলল, 'তোমাকে রাগলে এতো ভালো
লাগে আম্মু।'

ফাতিমা আড়চোখে ছেলের দিকে তাকান।
প্রশংসা শুনতে তিনি বেশ পছন্দ করেন।
লিখনের মুখে প্রশংসা শুনে একটু নিভলেন।

'হয়েছে, আর কতক্ষণ?'

'পাঁচ মিনিট। অলন্দপুরের মাতব্বর বড় মনের
মানুষ। আমাকে নিজের সন্তানের দৃষ্টিতে
দেখেন। যতদিন ছিলাম প্রতিদিন খোঁজ

নিয়েছেন। নিজের একজন লোককে আমার
সহায়ক হিসেবেও দিয়েছিলেন! উনার
বাড়িতেই উঠব।’

লিলি চোখমুখ বিকৃত করে বলল, ‘অন্যের
বাড়িতে উঠব! উফ।’

‘মারব ধরে। অন্যের বাড়ি তোর কাছে, আমার
কাছে না। মজিদ চাচার বউ ফরিনা চাচি এতো
ভাল রাঁধেন। আমাকে নিজের হাতে খাইয়ে
দিয়েছেন। উনার একটাই ছেলে। ঢাকায়
পড়ছে, ব্যবসা সামলাচ্ছে। তার সাথে অবশ্য
সাক্ষাৎ হয়নি। কিন্তু ফরিনা চাচি সারাক্ষণ
ছেলে, ছেলে করতেন। আমাকে পেয়ে ছেলের
সব ভালবাসা তেলে দিয়েছিলেন। তাই ওই বাড়ি
আমার কাছে আপন না লাগুক, পরও লাগে না।
আর বিশাল বাড়ি। উনারা বিব্রত হবেন না।
তিন-চার দিনেরই তো ব্যাপার।’

লিখনের এতো বড় বক্তব্যের পাছে কেউ কিছু বলার মতো পেল না।

হাওলাদার বাড়ির সামনে এসে ভ্যান থামে। বাড়ির চারপাশ সাজানো দেখে লিখন বেশ অবাক হলো। লিলি চারপাশ দেখতে দেখতে বলল, 'দাদাভাই, তুমি বিয়ে করতে এসেছো এই খবর উনারা পেয়েছেন বোধহয়। তাই এতো আয়োজন।'

লিখন লিলির মাথায় গাট্টা মেরে বলল, 'বাড়িতে দুটো মেয়ে আছে। তাদের কারো বিয়ে হবে হয়তো। চল।'

ইটের বড় প্রাচীর চারদিকে। মাঝে বড় গেইট। প্রাচীরের উচ্চতা ১৫ ফুট। আর গেইটের উচ্চতা বারো ফুট। গেইটের পাশে দাঁড়িয়ে ছিল দুজন লোক। দুজনই লিখনকে চিনে। তাই লিখনকে বাড়ির ভেতর ঢুকতে দিল। গেইট পার হলেই খোলা জায়গায়। প্রচুর গাছপালা।

বেশি সুপারি গাছ এবং তালগাছ। সবকিছু
সুন্দর! দুই মিনিট হাঁটার পর রঙ করা টিনের
একটা বড় ঘর। তার সামনে সিঁড়ি। সিঁড়ির
দু'পাশে সিমেন্টের তৈরি বসার বেঞ্চি। এই
ঘরটাকে গ্রামে আলগ ঘর বলা হয়, কেউ কেউ
আলগা ঘর বলে থাকে। অতিথিরা এসে বিশ্রাম
করে। রাত্রিযাপন করে। ভেতরে ইট সিমেন্টের
তৈরি দু'তলা অন্দরমহল। আলগ ঘরের
বারান্দায় বসে ছিলেন মজিদ মাতব্বর, ফরিদা,
রিদওয়ান। লিখনকে দূর থেকে দেখতে পেয়ে
উনারা অবাক হোন। সেই সাথে খুশিও। শহরের
চারজন মানুষ হেঁটে আসছে। সর্বাঙ্গে
আধুনিকতার ছোঁয়া। দেখতেও ভালো লাগে।
লিখন বারান্দায় পা রাখতেই মজিদ মাতব্বর
হেসে বলেন, 'আজকের দিনটা সত্যি খুব
সুন্দর।'

লিখন হাসল। ফরিনা এবং মজিদ মাতব্বরকে সালাম করে বলল, 'এই হচ্ছেন আমার বাবা- মা আর বোন। আর আশু, আবু উনি হচ্ছেন মজিদ চাচা। আর ইনি ফরিনা চাচি। আর ওইযে বড় বড় গোঁফদাড়িওয়ালা উনি হচ্ছেন রিদওয়ান ভাইয়া। এই বাড়িরই আরেক ছেলে।'

মজিদ মাতব্বর একজনকে ডেকে বলেন, চেয়ার দিয়ে যেতে। আর অন্তরমহলে খবর পাঠাতে মেহমান এসেছে। তাৎক্ষণিক চেয়ার ও ঠান্ডা শরবত চলে আসে। পরিচয় পর্ব শেষ হতেই লিখন প্রশ্ন করল, 'বাড়িতে কোনো অনুষ্ঠান চলছে নাকি?'

'সে চলছে। আমার ছেলেটার বিয়ে। একমাত্র ছেলে।'

লিখন হাসে। চোখ পড়ে আলগ ঘরের ডান পাশে। কয়েকটা মেয়ে উঁকি দিয়ে তাকে দেখছে। লিখন আনমনে হেসে উঠল। কোনো

মেয়ে যখন তাকে দেখে খুব তৃপ্তিদায়ক
অনুভূতি হয়। নায়ক কী এমনি এমনি হওয়া।
শব্দর আলী জিজ্ঞাসা করলেন, 'তাই নাকি?
তাহলে তো ঠিক সময়েই এসেছি। আমরাও
একমাত্র ছেলের বিয়ের প্রস্তাব নিয়েই এই
গ্রামে এসেছি।'

মজিদ মাতব্বর আগ্রহ নিয়ে জানতে
চাইলেন, 'মেয়ে কে? কার মেয়ে? আমাকে
বলুন। এখুনি বিয়ে করতে চাইলে এখুনি হবে।'
শব্দর আলী লিখনকে প্রশ্ন করেন, 'মেয়ের
পরিচয় বল।'

লিখন কথা বলার পূর্বেই ফরিনা গেইটের দিকে
তাকিয়ে চিৎকার করে উঠলেন, 'এই তো আমার
ছেড়ায় আইয়া পড়ছে। আমির এইহানে আয়।
দেইখা যা কারা আইছে।'

ফরিনার দৃষ্টি অনুসরণ করে সবাই পিছনে
তাকাল। আমির চুল ঠিক করতে করতে এগিয়ে

আসছে। হাঁটার গতিতে বোঝা যাচ্ছে, বেশ চঞ্চল একটা ছেলে। আমার ঘেমে একাকার। কয়েক ফুটের দূরত্ব থাকা অবস্থায় লিখনকে দেখেই আমার চিনে ফেলল। মগার কাছে লিখনের বর্ণনা শুনেছে। এছাড়া লিখন একজন নামকরা অভিনেতা। তার অভিনীত ছায়াছবি সে দেখেছে। আমার হাঁটার গতি কমিয়ে এগিয়ে এলো। লিখন উঠে দাঁড়াল। হেসে আমার সাথে করমর্দন করল। এরপর বলল, 'আমি লিখন শাহ।'

আমির বলল, 'আমির হাওলাদার। বসুন আপনি।'

লিখন নিজ স্থানে বসল। আমার একটু দূরত্ব রেখে দূরে বসল। মজিদ মাতব্বর আমিরকে লক্ষ্য করে বললেন, 'কোথায় থাকিস সারাদিন। বলেছিলাম না, লিখন শাহ এসেছিল? এইযে ইনি।'

আমির শুষ্কমুখে বলল,'চিনি আমি। উনার
অনেক কাজ(ছবি) আমার দেখা।'

শব্দর আলী,ফাতিমা,লিলি,লিখন সবাই হাসল।
কেউ চিনে বললে আনন্দ হবারই কথা।

রিদওয়ান আমিরকে বলল,' জানিস
আমির,লিখন বিয়ে করতে গ্রামে আসছে।'

আমির কিছু বলল না। ফরিনা জানতে
চান,'পাত্রী কে? কইলা না তো?'

লিখন বুক ভরা ভালোবাসা নিয়ে বলল,'পদ্মজা।
মোড়ল বাড়ির বড় মেয়ে।'

লিখনের কথা শুনে মুহূর্তে হাওলাদার বাড়ির
সব মানুষের মুখ কালো হয়ে গেল।আলগ

ঘরের পাশে দাঁড়িয়ে থাকা মেয়েগুলির
কোলাহল থেমে গেল। চারিদিক স্তব্ধ, শান্ত।

লিখন ভ্যাবাচ্যাকা খেয়ে গেল। কী হলো সবার!
লিখন মা-বাবার সাথে চাওয়াচাওয়ি করল।

মজিদ মাতব্বর শান্ত কণ্ঠে প্রশ্ন করলেন,'তার

সাথে তোমার বিয়ে হওয়ার কথা ছিল?’
মজিদ মাতব্বরের কথা বলার ধরণ পাল্টে
যাওয়াতে লিখন আহত হলো। বলল, ‘না। এখন
প্রস্তাব দিতে চাই।’

‘পদ্মজার সাথেই পরশু আমিদের বিয়ে।’

লিখন চকিতে চোখ তুলে তাকাল। বুক পোড়ার
মতো অসহনীয় যন্ত্রনা কামড়ে ধরে সর্বাঙ্গে।
হাড়ে হাড়ে বরফের ন্যায় ঠান্ডা কিছু ছুটতে
থাকে। এখুনি যেন সব রং ছিঁড়ে রক্ত বেরিয়ে
আসবে।

চলবে...